

四庫全書

子部

欽定四庫全書

子部

太平御覽卷一百六十九至
七十一

詳校官中書臣金應琦

員外郎臣牛稔文覆勘

總校官降詔編修臣倉聖脈

校對官助教臣胡予襄

謄錄監生臣李椿

欽定四庫全書

太平御覽卷一百六十九

宋 李昉等 撰

州郡部十五

淮南道

揚州

濠州

滁州

楚州

壽州

和州

廬州

舒州

蘄州

申州

光州

安州

黃州

沔州

揚州

元和郡縣圖志曰揚州廣陵郡禹貢九州揚州其一也
春秋時屬吳七國屬楚秦滅楚為廣陵併天下屬九江
郡漢為江都國建武元年復曰揚州

左氏哀九年曰吳城邗溝通江淮也

魏志曰黃初六年征吳幸廣陵城臨江觀兵見江濤洶湧嘆曰天所以限南北也

隋書曰大業元年詔修江都宮治龍舟鳳舸黃龍赤艚樓船萬艘以幸江都

宋書曰徐湛之為揚州起風亭月觀吹臺琴室

又曰揚州刺史王謐薨高帝次應入輔劉毅等不欲帝入議以中領軍謝混為揚州欲令帝于丹徒領州以二議諮帝劉

穆之謂帝曰揚州根本所係不可假人前授王謚事出權道
今若復他授便應受制于人一失權柄無由可得帝從之

郡國志曰廣陵以城置在陵上故曰廣陵此陵交帶崑
崙連接西蜀一名蜀岡一名崑崙岡鮑昭蕪城賦曰拖
以漕渠軸以崑岡

河圖括地象曰崑岡之山橫為地軸

漢志曰廣陵國高帝六年置景帝四年更名江都莽曰
江平江都易王非廣陵厲王胥皆都此

漢書曰廣陵厲王賜策曰嗚呼小子胥受茲赤社建爾

國家封于南土古人有言曰大江之南五湖之間其人

輕心揚州保強

保恃也

三代要服不及以正

要服次荒服之內正政也

要一
遙反

圖經曰江陽縣本漢江都縣也以在江之北故曰江陽

漢志曰江都屬廣陵國

又曰海陵縣臨淮郡莽曰亭間

十道志曰六合縣本秦堂邑縣春秋時棠也左傳襄十

四年楚子為庸浦之役故子囊師于棠

庸浦棠皆楚邑

楚州

元和郡縣志曰楚州淮陰郡禹貢揚州之域春秋時屬吳越戰國時屬楚秦屬九江郡漢為射陽縣之地

漢志曰射陽縣屬臨淮郡莽曰監淮亭在射水之陽故曰射陽

又曰廣陵王胥有罪其相勝之秦奪王射陂張晏曰射水之陂在射陽縣

晉書曰穆帝時中郎將荀羨北討云舊淮陰地形都要水陸交通易以觀釁沃野有開植之利方舟運漕無他屯阻乃營立城池焉

郡國志曰北對清泗臨淮守險有平陽石龜田稻豐饒吳越春秋曰吳將伐齊自廣陵掘溝通江淮

即州地也

史記曰越滅吳而不能正江淮北楚東侵廣地于泗上漢志曰盱眙屬臨淮郡都尉治莽曰武匡

南兖州記曰盱眙本春秋時善道地

漢書曰項羽立楚懷王孫心為楚懷王都盱眙

南兖州記曰南兖州地有鹽亭百二十三所縣人以魚
鹽為業略不耕種擅利巨海用致饒沃公私商運充實
四遠舳舻千計吳王所以富國強兵而抗漢室也

圖經曰寶應縣本安宜縣即漢之安平縣地屬廣陵郡
唐書曰天寶初有李氏女子既嫁而寡為尼名真如忽
有人自天而下以寶與之因名寶應

濠州

十道志曰濠州鍾離郡禹貢揚州之域春秋時為鍾離
子國戰國時屬吳秦置三十六郡屬九江郡漢置鍾離縣
春秋成十五年曰叔孫僑如會吳于鍾離始通吳也

始與

中國
接

又昭二十四年曰楚子為舟師以略吳疆遂滅巢及鍾離
史記楚平王十年吳之邊邑卑梁女與楚邊邑鍾離小
童爭桑兩家交怒相攻楚伐卑梁人卑梁大夫怒發兵
攻鍾離楚王聞之大怒吳亦發兵使公子光伐楚遂滅

鍾離

莊子曰莊子與惠子遊於濠梁之上見鯈魚出遊從容
莊子曰是魚樂乎惠子曰子非魚安知魚之樂莊子曰
子非我安知我不知魚之樂也

史記曰昔禹會諸侯于塗山執玉帛者萬國
十道志曰塗山在臨淮郡西

又曰招義縣本漢淮陵縣

漢志曰淮陵縣屬臨淮郡莽曰淮陸

壽州

元和郡縣志曰壽州壽春郡禹貢揚州之域秦併天下為九江郡漢為淮南國

伏滔正淮論曰爰自戰國至于晉之中興六百餘年保淮南者九姓稱兵十有一人皆亡不旋踵禍溢於世彼壽春者南引荊州之利東連三吳之地北接梁宋平途不過二百里西援陳許水陸不出千里外有江湖之阻內保淮淝之固龍泉之陂良田萬頃舒六之貢利盡蠻越

金石皮革之具萃焉苞木管竹之族生焉其俗尚氣力而多勇悍其人習戰爭而貴詐偽所以屢多亡國也

史記曰楚考烈王自陳徙都壽春號之曰郢

又項羽本紀曰項羽封英布為九江王都六盡有江淮之地

左傳文五年曰楚成大心仲歸帥師滅六

仲歸子家

冬楚公

子變滅蓼

今安蓼縣

臧文仲聞六與蓼滅曰臯陶庭堅不祀

忽諸德之不建民之無援哀哉

漢志曰壽春合肥受南北湖皮革鮑木之輸亦一都會

也

鮑鮑魚也木謂楓枹之屬

壽春記曰三國時江淮為戰爭之地其間數百里無復人居晉平吳其民乃還本土復立為淮南郡

齊書曰高祖初遣垣崇祖鎮壽陽謂之曰我新有天下魏悉以送劉昶為辭壽春賊之所衝宜為之備既而果然乃敗還

十道志曰霍丘縣本漢松茲縣也

漢志曰松茲侯國屬廬江郡莽曰誦善

十道志曰霍山縣濤縣也

漢志曰濤縣屬廬江郡天柱山在南

史記曰吳王闔閭四年伐楚取濤

滁州

元和郡縣志曰滁州永陽郡春秋時楚地在漢為全椒縣也

漢志曰全椒縣屬九江郡

十道志曰隋以為滁州以滁水為名

郡國志曰後漢彭城劉平為全椒令虎皆渡江

和州

元和郡縣志曰和州歷陽郡禹貢揚州之域春秋及戰

國時為楚地秦為歷陽縣屬九江郡漢為淮南國

郡國志曰歷陽西有遏胡城即王導築以禦石虎

漢志曰歷陽都尉治屬九江郡莽曰明義

十道志曰南有歷水故曰歷陽

淮南子曰歷陽之都一夕為湖

十道志曰麻湖在縣西十里

漢書曰漢王追項羽至江東城烏江亭長艤舟待之

廬州

元和郡縣志曰廬州郡古廬子國也春秋舒國之地

十道志曰戰國其地蓋楚秦置三十六郡屬九江郡漢為合肥焉

左傳僖公三年曰徐人取舒杜預注云舒國今廬江

舒縣也

尚書曰成湯放桀于南巢

魏志曰青龍元年滿寵為揚州都督請于合肥城西三十里置新城表曰合肥城南臨江湖北達壽春賊攻圍之得據水為勢官兵救之當先破賊大軍然後圍乃得解賊往甚易其救甚難今城西三十里有奇險可依立城固守此所謂引賊平地而犄其歸路也詔從之
廬江記曰人物語音風土明茂皆勝淮北諸郡

漢志曰廬江郡故淮南文帝十六年別為國領縣十二
又曰龍舒屬廬江郡應劭曰羣舒之邑

又曰居巢屬廬江郡應劭曰春秋楚人圍巢巢國也

左傳昭二十五年曰楚子使熊相祺郭巢

巢國也

郡國志曰濡須水出自巢湖謂之馬尾溝

十道志曰慎縣本漢浚遒縣

漢志曰浚遒縣屬九江郡

舒州

釋例曰舒有五名舒國庸舒龍舒舒鳩舒城其實一也

左傳定二年曰吳子使舒鳩民誘楚人

元和郡縣志曰舒州桐安郡禹貢揚州之域春秋時皖國也

十道志曰春秋時為楚東鄙戰國時屬楚秦置三十六郡為江夏郡

史記曰皖匿姓咎繇之後也春秋時楚滅之

漢志曰皖屬廬江郡

續漢書郡國志曰廬江縣自舒縣徙居皖

魏志曰正始二年孫權遣諸葛恪屯皖城以伺邊隙

吳志曰曹公遣朱光為廬江太守屯皖大開稻田呂蒙
上言曰皖地肥美若一收熟彼衆必增如是數歲操態
見矣宜早除之於是權親征皖破之

宋書州郡志曰晉安帝於舊皖城置懷寧縣

圖經曰桐城春秋時桐國也亦漢樅陽縣

左傳定二年曰桐反楚

桐小國也廬江
舒縣有桐鄉

漢書曰元封五年南巡狩至於盛唐自尋陽浮江射蛟江
中獲之舳艫千里薄樅陽而出作盛唐樅陽之歌

蘄州

十道志曰蘄州蘄陽縣禹貢揚州之域春秋及戰國時
並屬楚秦置三十六郡屬九江郡漢蘄春縣之地

漢志曰蘄春屬江夏郡

史記曰始皇十六年滅楚虜王負芻於蘄
地名記曰蘄春以水隈多蘄菜以水為名

晉書曰武帝以宣太后諱春改為蘄陽

吳志曰魏使廬江謝寄為蘄春郡典農呂蒙襲破之

賀齊傳曰初晉宗為戲口將以衆叛如魏還為蘄春太守圖襲安樂取其保質權以為恥因軍初罷六月盛夏出其不意詔齊督麋芳鮮于丹等襲蘄春生虜宗吳復置蘄春郡

申州

十道志曰申州義陽郡禹貢荊州之域春秋時申國之

地秦為南陽郡地漢置平氏縣屬荊州漢武封北地尉
衛止為義陽侯魏武帝分南陽立義陽郡宋文元嘉末
為義陽郡立司州周武帝為申州

輿地志曰義陽三關之險

十道志曰三關者平靖關

張老云此關因山為障
不營城隍故名平靖

其一

也武陽黃峴為二關在安州應山縣界

光州

十道志曰光州弋陽郡禹貢揚州之域春秋弦子國秦

置三十六郡屬九江漢為西陽縣

左傳僖五年曰楚人滅弦

弦在弋陽縣

弦子奔黃

漢志曰西陽屬江夏郡

又曰軹屬江夏故弦子國

圖經曰定城縣春秋黃子國也

十三州志曰定城置在古黃子國南十二里

十道志曰定城本漢弋陽縣

漢志曰弋陽侯國屬汝南郡弋山在西北故黃國今黃

城是也

十道志曰固始縣本寢丘孫叔敖所封之邑也

又曰殷城縣漢期思縣也

漢志曰期思屬汝南郡故蔣國也

左氏傳曰凡蔣周公之裔也

安州

十道志曰安州安陸郡春秋邾子之國雲夢之澤在後
焉楚滅邾封鬬辛為鄖公則其地也戰國屬楚秦併天

下為南郡地漢為安陸縣宋武置安陸郡唐武德四年為安陸州

黃州

十道志曰黃州齊安郡禹貢荊州之域戰國時屬楚秦為南郡地漢為西陵縣高齊置衡州隋開皇三年為黃州

又曰麻城黃陂縣本漢西陵縣也

沔州

十道志曰沔州漢陽郡禹貢荊州之域春秋鄭國之地

戰國時屬楚秦併天下為南郡地漢為安陸縣地晉立

沔陽縣屬江夏郡

沔音篆

唐武德四年置沔州

尚書禹貢曰逾于沔

漢上曰沔

三國志曰魏初定荊州沔陽以為重鎮

晉書曰永嘉六年王敦表陶侃為荊州刺史鎮沔陽

宋書州郡志曰晉於臨障山置沔陽縣

荊州記曰臨障山南峯謂之烏林峯亦謂之赤壁

吳志曰曹公臨荊州孫權遣周瑜程普為左右督領萬人遇於赤壁大破曹公軍

永初山川記曰沔口古以為滄浪水屈原遇漁父處

太平御覽卷一百六十九

欽定四庫全書

太平御覽卷一百七十

宋 李昉等 撰

州郡部十六

江南道上

昇州

宣州

池州

潤州

常州

蘇州

湖州

杭州

睦州

鄂州

饒州

信州

江州

洪州

撫州

吉州

袁州

虔州

建州

福州

泉州

漳州

汀州

南州

昇州

圖經曰昇州古揚州地春秋時為吳地戰國時越滅吳為越地後楚滅越其地又屬楚初置金陵邑秦併天下改金陵為秣陵屬鄣郡漢元封二年改鄣郡為丹陽郡漢志曰故鄣屬丹陽郡王莽曰侯望

金陵圖云楚威王見此有王氣埋金鎮之故曰金陵秦併天下望氣者言東南有天子氣鑿地斷岡改金陵為秣陵

吳志曰孫權長史張紘建計宜出都秣陵權從之

建康圖曰西晉亂元帝自黃陵渡江以此城荒蕪乃居縣北府第幕府之名自此而立尋以江寧為瑯琊國蓋龔帝始封之名也歷宋齊梁陳六代皆都之

輿地志曰金陵有東府城晉安帝時築其城西為簡文會稽第其東則丞相會稽王道子府謝安石薨以道子代領楊州州在第西故時人號為東府西州

圖經曰金陵有古冶城本吳鑄冶之地也

晉書曰元帝太興初以王導疾久方士戴陽曰君本命在申申地有冶金火相爍遂移治於石城

宣州

十道志曰宣州宣城郡禹貢揚州之域春秋時屬吳屬越越為楚所併又屬楚秦為鄣郡漢為丹陽郡地理志曰武帝元狩元年改鄣郡為丹陽郡屬揚州理宛城即今郡是也吳書曰孫皓以牛渚為督以何植為使而禦晉軍

桓玄傳曰玄居南州大築齊第以郡在國南故曰南州

齊州郡志曰梁承聖元年置南豫州

十道志曰隋開皇中改南豫州為宣州

漢志曰涇縣屬丹陽郡韋昭曰涇水出蕪湖

圖經曰南陵縣有赭圻屯在縣西北

晉書曰桓溫入參朝政自荊州還至赭圻遂城赭圻鎮
十道志曰南陵有鵲州

春秋左氏傳曰昭五年楚伐吳吳敗之鵲岸

廬江舒縣有鵲尾渚

漢志溧陽縣屬丹陽郡溧水所出也

又曰當塗縣侯國屬九江郡莽曰山聚

應劭曰禹娶塗山有禹墟焉

春秋左氏傳曰禹會諸侯於塗山

晉書州郡志曰西晉愍懷之亂瑯琊王出鎮揚州因渡江南卜金陵建大業衣冠禮樂州郡邑名並隨渡江從北地當塗來江南自東晉始也

金陵記曰姑熟之南淮曲之陽置南豫州六代英雄迭居於此以斯地為上游焉

池州

圖經曰池州池陽郡禹貢揚州之域春秋及秦漢為鄣郡之地吳為石城縣隋為秋浦縣唐武德中置池州

三國志曰吳黃武二年封韓當為石城侯

輿地志曰梁昭明太子以水出魚美故名其水為貴池又曰梁大同二年置石埭因貴池有兩石埭遂以為名

潤州

十道志曰潤州丹陽郡禹貢揚州之域春秋時吳國地謂之朱方吳為越所併地屬越戰國時越為楚所滅復

屬楚秦併天下為會稽鄣二郡之地漢初為荊國故荊王劉賈所都之地吳王濞誅以其地併入江都國武帝又分屬丹陽會稽二郡

左氏傳曰襄公二十八年齊慶封奔吳吳句餘予之朱方聚其族焉而居之富於其舊

後漢書曰建安中吳大帝自吳徙都京口十六年遷都秣陵復於京口置京督以為鎮焉

吳志曰京口所統藩衛尤要是以吳為重鎮

圖經曰其城因山為壘緣江為境爾雅曰丘絕高曰京
因謂之京口

又地理志曰秦時望氣者云其地有天子氣始皇使赭
衣徒三千人鑿坑敗其勢改云丹徒

圖經曰丹陽本漢曲阿縣也

漢志曰曲阿故雲陽莽曰風美屬會稽郡

史記曰秦始皇改雲陽為曲阿

輿地志曰曲阿縣屬東南徐之境秦使官吏因東南有

王氣在雲陽故鑿北崗截直道使曲以壓其氣故曰曲阿

又曰丹徒界內土堅緊如蠟諺云生東吳死丹徒言吳多產出可以攝生自奉養丹徒地可以葬

吳志曰岑昏鑿丹徒至雲陽而杜野小辛間皆斬絕陵

壟功力艱辛

杜野屬丹徒小辛屬曲阿

圖經曰唐垂拱四年立金山縣後改名金壇取邑界句曲之山金壇之陵以為號

真誥曰地脈似洛水北邙山土水似長安丹鳳門外井泉

河圖曰乃有地脈土良水清句曲之山金壇之陵

常州

十道志曰常州毗陵郡禹貢揚州之域春秋時屬吳後屬越戰國屬楚秦漢為毗陵縣屬會稽郡

輿地志曰晉陵縣春秋時吳之延陵也季札讓位耕於此因以封之漢改為毗陵

漢志曰毗陵縣屬會稽郡季札所居舊為延陵漢改之也莽曰毗壇

輿地志曰東海王越世子名毗中宗為越所表遣渡江故改此為晉陵

又曰吳越之間謂荆為楚秦以子楚改為陽羨其地本名小震居在荆溪之北故云陽羨

周處風土記曰陽羨本屬荆溪吳郡震澤之會也其地理則三江之雄潤五湖之腴表

吳越春秋曰周改為陽羨

漢志曰無錫屬會稽莽曰有錫

周處風土記曰周武王追封周章於吳又封章小子斌於無錫也

圖經曰昔有識述其地云無錫寧天下平有錫兵天下爭故名之

蘇州

十道志曰蘇州吳郡禹貢揚州之域周為吳國至闔閭

強盛始都於此後為越所滅秦併天下為會稽郡

釋名曰吳虞也太伯封於此以虞志也

漢書地理志曰吳粵之君皆好勇故其民至今用劍輕死易發吳東有海海鹽章山之銅三江五湖之利亦江東一都會也

越絕書曰闔閭起蘇臺三年聚財五年乃成高見三百里

漢志曰吳屬會稽郡周太伯所邑也具區澤在其西王

莽曰秦德

十道志曰嘉興縣本漢由拳縣也

漢志曰由拳縣屬會稽郡應劭曰古之槁里

吳錄地理志曰吳王時此地本名長水秦改曰由拳

續漢志曰屬吳地吳黃龍五年嘉禾生於由拳改縣曰禾興後以太子名禾改曰嘉興

圖經曰華亭縣本嘉興縣地天寶十年置因華亭谷為名

晉書曰陸機被誅臨刑嘆曰華亭鶴唳不可得聞

輿地志曰吳大帝以陸遜為華亭侯以其所居為封也
華亭谷出佳魚蓴菜故陸機云千里蓴羹未下鹽豉

湖州

十道志曰湖州吳興郡禹貢揚州之域防風氏之國也
春秋時為吳地後屬越越為楚所滅後屬楚秦漢屬會
稽郡

國語魯語曰吳伐越墮會稽獲骨節專車

骨節長專
擅一車也

吳

子使來好聘且問之仲尼曰骨何為大仲尼曰禹戮防風氏其骨節專車客曰防風氏何守也仲尼曰汪芒氏之君也守封禺之山者也

汪芒長翟國名封山禺山在吳郡永安縣

郡國志曰五湖之表州以為名也漢志曰烏程屬會稽郡有歐陽亭

郡國志曰古有烏氏程氏居此能醞酒故以名縣

地理志曰武康縣本烏程之餘不鄉地漢末童謠曰天子當興東南三餘之間吳乃改會稽之餘暨為永興分

餘不為永安以協謠言

吳興記曰長城縣吳王闔閭使弟夫槩居此築城狹而長晉武帝置縣因長城以名縣

杭州

十道志曰杭州餘杭郡禹貢揚州之域春秋時吳越地秦漢屬會稽郡

史記曰楚威王伐越殺王無疆盡取故吳地至浙江又曰始皇三十七年東遊丹陽至錢塘

漢志曰錢塘屬會稽郡西部都尉治王莽曰泉亭

劉道真錢塘記曰昔縣境逼近江流縣在靈山下至今
基址猶存郡議曹華信乃立塘以防海水募有能致土
石者即與錢及成縣境蒙利乃遷此地於是置錢塘縣

漢志曰於潛屬丹陽郡

潛音

吳錄地理志曰縣西潛山蓋因山以立名舊潛字無水
至隋添水

漢志曰餘杭屬會稽郡莽曰進睦

吳興記曰秦始皇三十七年將止會稽塗山因以立為縣

郡國志曰夏禹東去捨杭登陸於此乃以為名

十道志曰鹽官本漢海鹽由拳二縣境

漢志曰海鹽屬會稽郡故武原鄉有鹽官

睦州

十道志曰睦州新定郡禹貢揚州之域春秋時屬越國秦屬丹陽郡漢為歙縣也

吳志曰大帝以後漢建安十三年使威武中郎將賀齊討丹陽黥歙山賊平之分歙為始新新定黎陽休陽四縣并黥歙凡六縣

圖經曰隋置睦州取俗阜人和內外輯睦為義

十道志曰桐廬縣吳黃武四年分富春置以桐溪側有大椅樹垂條偃蓋傍蔭數畝遠望似廬因謂之桐廬漢志曰富春屬會稽郡莽曰誅歲

鄂州

十道志曰鄂州武昌郡禹貢荊州之域春秋時楚地秦屬南郡漢分置立江夏郡晉安帝義熙元年冠軍劉毅表以為夏口二州之中地居形要控接湖川邊帶溪沔請荊州刺史劉道規鎮夏口隋為江夏郡唐武德四年為鄂州

尚書禹貢曰江漢朝宗于海

十道志曰江漢二水會于州之西界

左傳曰吳伐楚沈尹射奔命于汭

世紀曰楚子熊渠封中子紅于鄂

今武昌縣也

江夏記曰一名夏口一名魯口沙陽夏汭鄂渚新興釣

渚皆其名

武昌記曰大帝築城於江夏以程普為太守遂欲都鄂
州改為武昌郡其民謠曰寧飲建業水不食武昌魚寧
歸建業死不向武昌居繇是徙都建業

齊書曰劉懷珍言於高帝夏口兵衝要地宜得其人遂
令柳世隆鎮焉

十道志曰江夏縣本漢沙羨縣

饒州

十道志曰饒州鄱陽郡禹貢揚州之域春秋時為楚東境秦為番縣地屬九江郡漢為鄱陽屬豫章郡隋開皇九年為饒州

地理志曰城即吳芮為番君時所築

漢書貨殖傳曰譬猶戎狄之與于越不相入明矣韋昭注曰于越今餘干縣越之別名

又曰淮南王安陳伐閩越之利書云越人欲為變必先
守餘干中可積食而有材可治船慮越人有伐材積食
之患

徐湛鄱陽記曰北有堯山故以堯為號又以地饒衍遂
加食為饒

圖經曰以山川蘊物珍奇故名饒

信州

圖經曰唐上元元年正月江淮轉運使元載以此邑川

原負遠闕防襟帶宜置州治可賜名信州以信美所稱
為郡之名

鄱陽記曰界內之山出銅及鉛鐵者有玉山

江州

十道記曰江州尋陽郡禹貢揚荊二州之境尚書禹貢
彭蠡既豬又曰九江孔殷

周景武廬山記曰柴桑彭澤之郊古三苗國舊廬江也
尋陽記曰春秋時吳之西境後吳為楚滅更為楚地秦

屬廬江郡漢屬淮南國晉武太康十年因江水之名而置江州成帝咸和元年移理湓城即今郡是

晉地道記曰尋陽南通五嶺北導長江遠行岷漢亦一都會也

洪州

十道志曰洪州豫章郡禹貢揚州之域春秋時吳地秦為九江郡漢為豫章郡

豫章記曰太康中望氣者云豫章廣陵有天子氣故封

愍懷太子為廣陵王領軍以鎮豫章後永興中懷帝遂以豫章王登天位隋平陳罷郡為洪州

撫州

十道志曰撫州臨川郡禹貢揚州之域春秋時吳地秦為九江郡漢為豫章郡今為南昌縣地後漢分南昌立臨汝縣吳太平二年分豫章之臨汝南城縣立臨川郡即今州也隋平陳置撫州

晉書曰王羲之嘗為臨川內史置宅於郡城東偏旁臨

迥漢特據層阜

荀伯子臨川記曰王右軍故宅其地爽塏山川若畫每至重陽日二千石已下多遊萃於斯舊井及墨池並在漢地理志曰高帝六年命大將軍灌嬰立洪州其年分洪州南境立南城縣以其在郡城之南故曰南城

吉州

十道志曰吉州廬陵郡春秋時為吳地戰國屬楚秦併天下屬九江郡南部都尉理漢為廬陵縣屬豫章郡

豫章記曰靈帝末揚州刺史劉遵上書請置廬陵鄱陽
二郡獻帝初平二年始立郡

圖經曰隋平陳改廬陵郡置吉州以吉陽山為郡名

袁州

十道志曰袁州宜春郡禹貢揚州之域春秋時吳地秦
屬九江郡漢為豫章郡之宜春縣晉武改宜春為宜陽
隋平陳分洪州之宜陽為袁州

漢書曰武帝封長沙定王子為宜春侯

吳錄曰宜春縣出美酒每歲上貢封酒親付計吏

虔州

十道志曰虔州南康郡春秋時吳地秦屬九江郡漢為
贛縣地屬豫章郡後漢興平二年分豫章立廬陵郡而
贛縣屬焉晉太康三年立為南康郡隋平陳立虔州以
虔化縣得名

圖經曰贛縣章貢二水雙流至縣合為贛水其間置邑
因以名縣

十道志曰南康縣本漢南野縣也

吳錄曰南野縣有大庾山九嶺嶠以通廣州

建州

十道志曰建州建安郡古閩越之地秦閩中郡漢屬會稽吳分置建安郡陳屬閩州隋平陳屬泉州唐武德四年置建州因建溪為名

方輿志曰浦城縣本漢東侯官之北鄉也吳永安三年改為吳興縣

圖經曰晉尚書陸邁梁尚書郎江淹皆為吳興令按淹自序云吳興地在東南嶠外閩越之舊境是也

福州

福州圖經曰勾踐六代孫為楚所併其後有無諸以其境南泉山之地因而都之稱閩越王其弟餘善至孫繇又以東海嶠之地稱越王俱是會稽之越遂有三越之稱

圖經曰梁承聖二年封蕭基為長樂侯於此

十道志曰福州長樂郡亦閩越地秦為閩中郡漢高帝立無諸為閩越王遂都於此晉置晉安郡陳置閩州唐開元十三年為福州

開元錄曰閩州越地即古東甌今建州亦其地皆蛇種有五姓林黃等是其裔

郡國志曰漢武元鼎六年立都尉居候官以禦兩越所謂東北一尉西南一候也

泉州

十道志曰泉州清源郡秦漢土地與長樂同東晉南渡
衣冠士俗多萃其地以求安堵因立晉安郡宋齊以後
因之唐景雲二年置泉州天寶初為清源郡

漳州

十道志曰漳州漳浦郡歷代土地與長樂郡同唐分其
地置漳州

郡國志曰梁山有漳浦水一云漳溪水

汀州

十道志曰汀州臨汀郡歷代土地舊與長樂郡同唐開元二十六年分置汀州初置在新羅縣以其地瘴居者多死大厯中移理長泊汀白石村

南州

十道志曰南州南川郡禹貢梁州之域周省梁入雍戰國時巴國之地秦漢為巴郡之境

太平御覽卷一百七十

欽定四庫全書

太平御覽卷一百七十一

宋 李昉等 撰

州郡部十七

江南道下

越州

歙州

明州

台州

處州

溫州

婺州

衢州

潭州

岳州

衡州

永州

道州

郴州

連州

邵州

黔州

思州

費州

辰州

錦州

溪州

叙州

施州

播州

珍州

夷州

葉州

漆州

越州

十道志曰會稽郡禹貢揚州之域春秋時越國

春秋元命苞曰牽牛流為揚州分為越國

史記曰越王勾踐其先禹之苗裔而夏后帝少康之庶

子也封於會稽以奉守禹之祀文身斷髮披草萊而邑焉

吳志曰會稽南面山萬重北帶滄海千里

輿地志曰順帝時陽羨人周嘉上書請分浙江已西為

吳郡東為會稽郡

宋略曰會稽山陰編戶三萬號為天下繁劇王羲之云
每行山陰道上如鏡中遊王獻之望鏡湖澄澈清流瀉
注乃云山川之美使人應接不暇

郡國志曰越城無北面以示伐吳後終滅吳

漢志曰會稽郡秦置高帝六年為荊國十二年更名吳
景帝四年屬江都領曲阿縣三十六

吳越春秋曰禹巡行天下歸還於越會計脩國之道以
會稽名山

漢志曰剡縣屬會稽

南史曰張稷為剡令至嵎亭生子因名嵎字四山

漢志曰諸暨縣屬會稽郡莽曰疏虜

十道志曰縣有暨浦諸山因以為名

會稽志曰龜山之下有東武里即琅琊東武縣山一夕移於此東武人皆徙此故立不動

歙州

十道志曰歙州新安郡禹貢揚州之域春秋時屬越秦屬丹陽郡

漢志曰歙都尉治屬丹陽郡又曰黟縣屬丹陽郡漸江出焉成帝鴻嘉二年為廣德國王莽曰愬虜

師古曰黟音伊字與黠同

晉書曰孔愉字敬康會稽人永嘉之亂避地入新安山谷

中以稼穡讀書為業信著鄉里後奄忽而去人皆以為神
梁書曰任昉為新安太守調楓香二石始入三兩便止
不欲遺之後人及下任惟有桃花米二十石

圖經曰績溪縣以界內乳溪與徽溪相去一里迴轉屈
曲並流離而復合謂之績溪縣因名焉任昉為新安太
守行春至此累日不返百姓因名溪為昉溪

又曰新安貢柿心黑木黝之字縣職此之由

又曰祁門縣本名閭門著於秦漢之代縣有巨石夾流

水兩兩相對其狀似門故號閭門

又曰婺源縣本晉休寧縣東陽記曰以上應婺女故名之

明州

十道志曰明州餘姚郡古舜為餘姚之墟

漢志曰餘姚屬會稽郡本鄞縣之地

輿地志曰邑人以其海中物產於山下鄞易因名鄞縣
圖經曰鄞縣有甬東及句章故城

台州

十道志曰台州古越州會稽郡之地禹貢揚州之域春秋時列國秦屬閩中郡後越王無疆七代孫閩君搖率越人佐漢伐秦惠帝錄其功封搖為東海王都於東甌山海經曰甌在海中郭璞注云今臨海永寧縣即東甌在岐海中也

南海中鬱林郡為西甌

吳地志曰漢書閩越圍東甌東甌告急於天子天子遣大中大夫嚴助發兵往救東江淮間後往往漸出乃以東甌地為回浦縣

漢志曰回浦東部都尉理屬會稽郡揚雄解嘲曰東南一尉西北一候

十道志曰唐武德四年討平李子通於臨海縣置海州五年改海州為台州

處州

圖經曰處州縉雲郡古縉雲之墟也秦為會稽郡地漢初為東甌地後以為回浦縣光武更名章安晉分為永嘉郡輿地志曰永嘉郡本會稽東部地晉明帝大寧元年分

臨海等縣立永嘉郡

圖經曰麗水縣有惡道惡道有突星瀨謝靈運與弟書
曰聞惡道溪中九十九里有五十九灘永嘉記曰王右
軍遊惡灘奇絕遂書突星瀨於石

輿地志曰松陽縣本章安南鄉漢永建時立為縣吳地
記曰縣東南臨大溪有松楊樹大八十一圍腹中空可
容三十人坐故取此為名王右軍嘗往看之永嘉記曰青
田縣有草葉似竹可染碧名為竹青此地可產故名青田

温州

十道志曰温州永嘉郡會稽之東境也漢永建四年置永寧縣
郡國志曰永嘉為東甌鬱林為西越斯地蠶一年八熟
圖經曰永嘉縣漢治縣之地後漢改為章安縣

漢志曰治本閩越地屬會稽郡

婺州

十道志曰婺州東陽郡禹貢揚州之域春秋時為越之
西界秦屬會稽郡漢初屬吳荆二國

郡國志曰婺州正得東越之勝地漢時其地屬會稽為東揚州人俗輕躁少信行好淫祀

鄭緝之東陽記曰此境於會稽西部嘗置都尉理於此吳寶鼎元年始分會稽置東陽郡隋平陳置婺州蓋取其地於天文為婺女之分野

異苑曰東陽顏烏以淳孝著聞羣鳥助銜土塊為墳烏口皆傷一境以為至孝所致因以縣名烏傷

十道志曰唐武德七年改烏傷為義烏

衢州

十道志曰衢州信安郡土地所屬與婺州同唐武德四年平李子通於信安縣置西有三衢山因以為名

輿地志曰後漢獻帝初平三年分太平縣立新安縣晉太康元年以弘農有新安改名為信安

左傳曰越伐吳王孫彌庸觀越見姑蔑之旗杜註云今東陽太末縣是也

輿地志曰姑蔑秦漢為太末縣今龍游及春秋東陽太

耒縣是也

潭州

十道志曰潭州長沙郡禹貢揚州之域春秋及戰國時為黔中地之南境晉懷帝永嘉元年分荊州為湘州隋平陳改湘州為潭州

史記天官書曰翼軫為楚分傍一小星為長沙星

漢書曰高帝封番君吳芮為長沙王

又曰長沙定王發景帝二年立以母微無寵故王卑濕

貧國應劭注曰景帝後二年諸王來朝有詔更前稱壽
歌舞定王但張袖小舉手左右笑其拙上怪問之對曰臣
國小地狹不足迴旋帝乃以武陵零陵桂陽屬焉

郡國志曰炎帝神農氏葬於長沙長沙之尾東至江夏
謂之沙羨是其地

十三州志曰西自湘江至東萊萬里故曰長沙

湘州記曰始皇二十五年併天下分黔中以南之沙鄉
為長沙郡以統湘川蓋取星以名焉

遁甲經曰沙羨之地雲陽之墟可以長生可以避世

湘中記曰其地舜之遺風人多淳朴今故老猶彈五弦琴好為漁父吟

湖南風土記曰長沙下濕丈夫多夭折俗信鬼好淫祀茅蘆為室頗多越風

岳州

十道志曰岳州巴陵郡禹貢荊州之域古三苗國地春秋及戰國時屬楚秦屬長沙郡晉分長沙之巴陵置建

昌郡在巴陵齊武封子倫為巴陵王梁封齊明帝子寶
義為巴陵王奉齊後以備三恪隋平陳改為岳州
尋江記曰昇屠巴蛇於洞庭其骨若陵故曰巴陵
淮南子曰斬蛇於洞庭

十道志曰巴陵縣本漢下雋縣之巴丘地

漢書地理志曰下雋縣屬長沙郡

十道志曰華容縣本漢孱陵縣

衡州

十道志曰衡州衡陽郡春秋時屬楚秦屬長沙郡漢為
酃縣地屬長沙國吳分長沙之東境立為湘東郡隋平
陳罷郡為衡州因衡山以取名

尚書禹貢曰荆及衡陽惟荊州

甄烈湘州記曰宋大明中望氣者云湘東有天子氣遣
使者巡視斬崗以厭之其後湘東王為天子即明帝也
圖經曰茶陵縣者以其陵谷生茶茗

永州

十道志曰永州零陵郡禹貢荊州之地春秋及戰國時楚之南地秦屬長沙郡漢屬長沙國晉以零陵屬湘州隋平陳置永州因以永水為名

梁書曰孫謙字長信為零陵太守有善績吏人安之先是郡多猛獸謙至絕迹去官之夜猛獸即害居人

甄烈湘州記曰石鷺山石其形似鷺大小如一每山雨即頡頏飛翔

羅含湘中記曰石鷺在泉陵縣雷風則羣飛然其土人

稀有見者

又十道志曰零陵縣本漢泉陵縣

道州

十道志曰道州江華郡禹貢荊州之域春秋及戰國時屬楚漢屬長沙國唐貞觀八年為道州

圖經曰昔舜封象有庠國即其地

郴州

十道志曰郴州桂陵郡禹貢荊州之域春秋及戰國時

屬楚秦屬長沙郡漢高祖二年分長沙南境立桂陽郡
屬荊州部居郴梁元帝為蘆縣郡屬衡州隋平陳改為
郴州

史記曰項羽徙義帝於長沙都郴

連州

十道志曰連州連山郡春秋時楚地秦為長沙郡之南
境兩漢為桂陽郡之桂陽縣吳屬始興郡晉因之宋於
此立宋安郡後齊如之梁為陽山郡唐武德四年改為

連州以郡南黃連山嶺為名

邵州

十道志曰邵州邵陽郡禹貢荊州之域春秋時屬楚秦為長沙郡漢為邵陵縣吳分零陵北部為邵陵郡屬荊州即今州也晉武改邵陽為昭陽唐貞觀十年改為邵州又曰邵陽縣本漢邵陵縣地屬長沙國

黔州

十道志曰黔州黔川郡禹貢荊州之域戰國為楚黔中

地秦昭王伐楚置黔中郡其地又屬焉漢武陵郡之酉陽縣武陵五溪蠻之西界也周武帝保定四年蠻帥思鶴以地內附置奉州建德三年改為黔州

吳錄曰黔陽屬武陵郡黔陵今辰州三亭縣西故城是也

思州

十道志曰思州寧夷郡禹貢荊州之域春秋楚地隋開皇十八年置務川縣屬巴東郡唐武德四年以務川當

牂牁要路置務州貞觀八年改為思州因思邛水為名

費州

十道志曰費州涪川郡禹貢荊州之域春秋時屬秦漢武帝元鼎六年通牂牁郡其地屬焉江山阻遠為黑獠所居多不臣附周宣改元獠王元殊多質等歸國遂立州取費水為名

九州要記曰九丘之外有費州

辰州

十道志曰辰州盧溪郡禹貢荊州之域春秋時屬楚其地即古蠻夷之地秦昭王使白起伐楚略取蠻夷置黔中郡漢改黔中為武陵郡隋開皇平陳改為辰州

沅陵記曰五溪十洞頗為邊患自馬伏波征南之後雖為郡縣其民叛擾代或有之蓋恃山險所致

十道志曰壺頭山後漢馬援征武溪蠻取壺頭山賊乘高守險水迅船不得進士卒多疫死援亦中病穿岸為室以避炎氣遂卒於此

武陵記曰山邊有石窟即馬援所穿屋也室內有大蛇如舟云是援之餘靈

十道志曰故老云楚文子滅巴巴子兄弟五人流入黔中漢有天下名曰酉辰巫武源等五溪為一溪之長故號五溪

錦州

十道志曰錦州盧陽郡歷代土地與辰州同唐武德初以辰州之地析置錦州

溪州

十道志曰溪州靈溪郡禹貢荊州之域歷代土地所屬與辰州同唐武德中立溪州蓋取五溪相會於此

又曰大鄉縣本漢沅陵零陵二縣地屬武陵郡梁分立大鄉縣三亭縣本漢零陵西陽縣地屬武陵郡唐分大鄉縣縣有小酉山黔山大酉山

叙州

十道志曰叙州潭陽郡古蠻夷之地戰國時為楚黔中

地唐貞觀八年為巫州天授三年為巫山不在州界改為沅州以沅江水改為郡名開元十三年仍舊為巫州至大歷五年為叙州

五溪記曰民多射生而鼻飲噉蛇鼠捕蝦蟹朝營夕用故無宿給

施州

十道志曰施州清江郡禹貢荊州之域春秋時為巴國七國時為楚巫郡地秦昭王伐楚置黔中郡巫地屬焉

周武建德二年酋長向邵兄弟四人相率內附立施州
又曰清江郡本漢巫縣地屬南郡巫縣今夔州巫山縣
是也吳晉及周為沙渠之地隋於此置清江縣

播州

十道志曰播州播川郡秦夜郎縣之西南隅惠王十四
年欲得楚黔中地以武關之外易之今徑歷黔府即總
謂黔中地漢武元鼎六年平西南夷置牂牁郡其地屬
焉以且蘭有挾船牂牁因此立郡以名焉貞觀九年於

此界置郎州後省十三年又於其地置播州以其地有播川因名焉

漢書曰唐蒙上書說武帝曰聞夜郎國有精兵可十餘萬浮舟牂牁出其不意以制越此一奇也

珍州

十道志曰珍州夜郎郡古山獠夜郎國之地晉永嘉五年分牂牁置夜郎郡兼置哀州唐貞觀十七年擴闢邊夷置播川鎮後因川中有降珍山因以鎮為珍州取山

名郡也

九州志曰夜郎自古非臣伏州郡之地漢武開拓南邊始置夜郎縣屬牂牁郡即牂牁都尉治之

後漢書曰夜郎者臨牂牁江江廣百餘步足以行船十三州志曰牂牁者江中山名也

夷州

十道志曰夷州義泉縣古徼外蠻夷之地漢置牂牁郡歷代恃險不臣隋大業七年始招慰置綏陽縣屬明陽


郡唐武德四年置夷州

葉州

十道志曰葉州龍溪郡古蠻夷之地唐置葉州後為龍溪郡

漆州

十道志曰漆州漆溪郡古蠻夷之地唐貞觀八年開拓南蠻於榮懿縣立漆州地多貢象牙後或為漆溪郡



太平御覽卷一百七十一

欽定四庫全書

子部

太平御覽卷一百七十二
七

詳校官侍讀學士_臣沈咸熙

員外郎_臣牛稔文覆勘

總校官降調編修_臣倉聖脈

校對官助教_臣胡子衷

謄錄監生_臣閻學洙

欽定四庫全書

太平御覽卷一百七十一

州郡部十八

嶺南道

廣州

潮州

潮州

宋 李昉等 撰

韶州

循州

恩州

春州

賀州

端州

藤州

新州

勤州

賓州

桂州

昭州

康州

封州

瀧州

高州

義州

蒙州

富州

梧州

潯州

龔州

鬱林州

平琴州

賓州

澄州

繡州

象州

柳州

融州

邕州

貴州

黨州

橫州

田州

嚴州

山州

淳州

羅州

潘州

容州

辯州

白州

牢州

欽州

南安都護府

武義州

粵州

芝州

愛州

福祿州

長州

驪州

峯州

陸州

廉州

巖州

雷州

禹州

湯州

滾州

籠州

環州

古州

崖州

儋州

振州

瓊州

萬安州

廣州

十道志曰廣州南海郡秦置南海郡二漢因之漢置交州吳因之分置廣州宋齊皆因之梁陳並置都督府隋平陳又置潘州煬帝初復置南海郡唐為廣州

山海經曰桂林八樹在賁禺東註云賁禺即番禺也

吳錄曰番禺縣有禺山尉陀所葬

南粵志曰肅連山西十里有靈州山焉其山平原彌望四野

極目郭景純云南海之間有衣冠之氣者斯其地也

廣州記曰尉陀築朝臺以朝天子

南粵志曰朝臺下有趙陀城朝臺西三十里即崗旁江
構粵華館以送陸賈因稱朝臺

十道志曰番禺北津水今名廉平水

韶州

十道志曰韶州始興郡禹貢揚州之域春秋戰國皆楚
地秦屬南海郡二漢屬桂陽郡吳置始興郡晉因之宋

改為廣興齊復為始興隋平陳為韶州以韶石為名
郡國志曰韶州科斗勞水間有韶石二狀雙闕永和二
年有飛仙衣冠遊二石上昔舜遊登此石奏韶樂因以
名之

岡州

十道志曰岡州義寧郡禹貢揚州之域秦漢並屬南海
郡東晉末分置新會郡宋齊並因之隋平陳置封州後
改為亢州後改為岡州

郡國志曰岡州地近大海晴少雨多時遇甚風林宇悉拔俗織竹為釜以蠟殼屑泥之煮鹽轉久彌密

循州

十道志曰循州海豐郡春秋時為百粵之地戰國時屬楚秦二漢南海郡地晉亦然隋平陳置循州

南粵志曰郡東水道一十里趙陀昔為龍州尉所莅於此

潮州

十道志曰潮州潮陽郡亦古閩粵地秦時屬南海郡秦末屬尉陀漢初屬南粵後亦屬南海郡後漢因之晉置東官郡隋平陳置潮州

郡國志曰稻得再熟蠶亦五收煮海為鹽

十道志曰海陽縣本漢揭陽縣地

南粵志曰潮陽縣窮海之北故曰潮陽

恩州

十道志曰恩州恩平郡秦屬南海郡二漢為合浦郡唐

貞觀中置恩州

春州

十道志曰春州南陵郡古百粵地秦屬南海象郡漢合浦郡之高涼縣地晉分恩平縣唐武德四年討平蕭銑置春州

賀州

十道志曰賀州臨賀郡秦屬南海郡二漢屬蒼梧郡吳分置臨賀郡晉因之宋為臨慶國齊復為臨賀郡陳因

之隋平陳置賀州因賀水為名

端州

十道志曰端州高要郡秦屬南海郡兩漢並屬蒼梧郡
晉亦然宋齊並屬南海郡陳置高要郡隋平陳置端州
南粵志曰石室山傍洞雲霧自生風烟有二石門以為
仙之下都

藤州

十道志曰藤州感義郡秦屬南海郡二漢並屬蒼梧郡

晉屬永明郡隋平陳置藤州煬帝初州廢置永平郡唐復為藤州

新州

十道志曰新州新興郡古越地秦始皇畧取陸梁地置象郡今州即其地也漢為合浦郡之臨元縣晉穆永和七年分蒼梧郡於此置新寧郡梁隋唐為新州

勤州

十道志曰勤州銅陵郡秦屬南海郡二漢屬合浦縣隋

屬信安郡唐置勤州為銅陵郡

賓州

十道志曰賓州懷德郡禹貢揚州之域古越地漢蒼梧郡之端溪縣先管羅賓洞因為名唐武德五年置南扶州貞觀八年改為賓州

郡國志曰賓州悉以高欄為居號曰干欄三日一市焉又曰特亮縣在河涸水北昔有白牛夜出光影照村村人見此牛光號為特亮也

桂州

十道志曰桂州始安郡禹貢揚州之域春秋時越地七國時為楚越之交始皇二十三年嘗發逋亡人贅婿賈人畧取陸梁地是為桂林郡焉二漢屬零陵蒼梧二郡吳置始安郡晉武改為始建齊復為始安梁天監六年置桂州於蒼梧鬱林之境無定理處大同六年移桂州於今理隋大業三年罷州唐武德四年復置桂州

始安記曰吳越之境其性好劍輕死易發火耕水耨人

養魚稻無千金之家好巫鬼好淫祀

十道志曰臨桂縣荔水水源多生桂桂生處不生雜樹

昭州

十道志曰昭州平樂郡秦屬桂林郡地二漢屬蒼梧郡
宋屬始建國齊屬始安郡隋亦然唐武德四年置樂州
貞觀八年改為昭州取昭潭為名

盛弘之荊州記曰平樂縣西南數十里山間有兩石如
人眼極大瞳子黑白分明

郡國志曰俗以青石為刀劍如銅鐵法婦人以為環玦
代珠玉也夷人往往化為羆羆小虎也

康州

十道志曰康州晉康郡秦屬南海郡二漢屬蒼梧郡晉
分置晉康郡宋齊因之隋平陳廢晉康併入信安郡今高要郡
唐復置康州

封州

十道志曰封州臨封郡土地所屬自秦已上與康州同

今州即漢蒼梧郡之廣信縣也梁置信安郡兼置成州
隋平陳廢郡改成州為封州

瀧州

十道志曰瀧州開陽郡

瀧數江切

土地所屬自漢已上與康

州同晉分端溪置龍鄉縣今州即其地

南越志曰龍鄉縣屬廣熙郡梁分廣熙置建州又分建
州之雙頭洞置瀧州即此是也

高州

十道志曰高州高涼郡秦以前土地與晉康同二漢屬合浦郡吳置高涼郡晉因之梁置高州隋平陳郡廢而高州如故唐為高州

南越志曰高涼郡本合浦縣也建安十六年衡毅錢博拒步騭高安峽毅水死博與其屬亡于高涼呂岱為刺史博既請降遂以博為高涼都尉於是始增置高涼郡焉

義州

十道志曰義州連城郡土地所屬秦以上與潘州同漢置蒼梧郡今州即蒼梧之孟陵縣唐武德四年江表底定於此置南義州貞觀二年於此置義州

蒙州

十道志曰蒙州蒙山郡漢武平南越置蒼梧郡今州即蒼梧之荔浦縣也隋置隋化縣唐置蒙州州有山號曰蒙山山下皆姓蒙因為州

富州

十道志曰富州開江郡秦桂林郡地二漢屬蒼梧郡梁
為開江武城二郡地陳置靜州改開江武城二郡為逍
遙郡隋平陳並廢唐又置靜州貞觀八年改為富州因
富水為名

梧州

十道志曰梧州蒼梧郡秦屬桂林二漢為蒼梧晉以後
並因之梁屬成州隋平陳改為封州唐改為梧州

漢書曰武帝元始六年開蒼梧郡

禮記曰舜葬蒼梧之野

潯州

十道志曰潯州潯江郡秦屬桂林二漢以後並屬鬱林郡隋屬永平鬱林二郡地唐置潯州

郡國志曰大賓縣漢布山縣地有堂牛與蛇同穴牛嗜鹽里人以皮裹手塗鹽入穴探之牛舐之出外則不得入取其角為器一曰糖牛

龔州

十道志曰鬱州臨江郡秦屬桂林郡漢平南越置蒼梧郡今州即郡之孟陵縣地唐置鬱州

鬱林州

十道志曰鬱林州鬱林郡秦為桂林郡漢改為鬱林郡後漢因之梁置定州改為南定州隋平陳改為尹州煬帝初為鬱林郡唐為鬱林州

平琴州

十道志曰平琴州平琴郡舊鬱林郡地唐置平琴州或

為平琴郡

賓州

十道志曰賓州安城郡古越地秦桂林郡地漢為鬱林郡又為鬱林郡之嶺方縣地唐貞觀五年置賓州

澄州

十道志曰澄州賀水郡古越地秦為桂林郡漢為鬱林郡之嶺方縣唐武德四年置澄州

繡州

十道志曰繡州常林郡秦屬桂林郡二漢屬鬱林郡吳以後因之唐平蕭銑置繡州

象州

十道志曰象州象郡秦屬桂林郡二漢為鬱林郡吳又分置桂林郡晉宋齊因之隋平陳置始安郡唐武德四年置象州因象山為名

秦之象郡今合浦郡非此象州

柳州

十道志曰柳州龍承郡秦漢土地與象州同晉以後屬

桂林郡隋屬始平郡唐平蕭銑置昆州唐貞觀八年改為柳州

融州

十道志曰融州融水郡歷代土地與柳州同唐置融州

邕州

十道志曰邕州朗寧郡古越地秦為桂林郡漢鬱林郡之嶺方縣武德四年置南晉州貞觀六年改為邕州

圖經曰人俗恠嗇流薄內儉外蠢椎髻跣足尚雞卜卵

卜

貴州

十道志曰貴州懷澤郡虞舜暨周並為荒裔秦為桂林郡自漢以下與鬱林郡同唐置貴州

黨州

十道志曰黨州寧仁郡秦桂林郡地唐置黨州

南越志曰黨州寧仁郡有京觀即古征黨洞殺俘虜處

橫州

十道志曰橫州寧浦郡古越地秦象郡地漢為合浦郡之高涼縣地隋於此置簡州又改緣州唐改為橫州

田州

十道志曰田州橫山郡土地與朗寧郡同唐為田州

嚴州

十道志曰嚴州循德郡禹貢荊州之域漢武平南越置象郡唐乾封三年置嚴州地在嚴岡之側因為名

圖經曰州門有長河水深八十丈從牂牁流下

山州

方輿志曰山州龍池郡土地與嚴州同唐為山州或為龍池郡

淳州

方輿志曰淳州永定縣秦屬桂林郡地唐武德四年置至永貞以犯憲宗廟諱改為巒州以巒山為名

羅州

十道志曰羅州招義郡禹貢揚州之域漢屬南粵宋元

嘉三年鎮南將軍檀道濟巡撫於羅陵口築城以名之
屬高涼郡唐武德五年因其地復置州

南越志曰招義縣者流人營也

潘州

十道志曰潘州南潘郡古甌駱粵地秦平百粵為桂林
郡地漢為合浦縣地屬合浦郡唐武德四年置南宕州
八年改為潘州

嶺表記曰潘州昔有方士潘茂於此昇仙遂以名

容州

方輿志曰容州晉寧郡古越地屬象郡二漢屬合浦郡
宋太始七年分合浦縣於此立南流郡齊梁陳不改隋
廢唐武德四年置銅州貞觀八年改為容州因容山為
名

十道志曰鬼門關在北流縣南三十里兩石相對狀若
關形闊三十餘丈昔馬援討林邑經此立碑石碣尚存
昔時趨交趾皆由此關已南尤多瘴厲去者罕得生還

故諺曰鬼門關十人去九不還

郡國志曰斯地瘴氣春為青草瘴秋為黃茅瘴有江水

辯州

十道志曰辯州陵水郡古越地秦象郡地二漢屬合浦

縣唐置辯州

郡國志曰辯州在陵羅二水之間

白州

十道志曰白州南昌郡古越地秦象郡地漢為合浦郡

唐武德四年置南州六年改為白州

嶺表錄曰州有一派水出自雙水山合容州江呼為綠珠井在雙角山下昔梁氏之女有容貌石季倫為交趾採訪使以真珠三斛買之梁氏之居舊井存焉

牢州

十道志曰牢州定州郡本巴蜀西南徼外夷秦屬象郡漢屬牂牁郡唐置義州改為智州貞觀十一年改為牢州以牢石為名

欽州

十道志曰欽州寧越郡歷代土地與白州同宋齊以來置宋壽郡梁又置安州隋平陳改為欽州

南安都護府

方輿志曰南安府今理宋平縣古越地禹貢揚州之域號為百粵在周為越裳重譯之地秦屬象漢為交趾日南二郡界後漢因之唐為交州

又曰人俗雜蠻夷之風其人皆服布如單被穿中央以

貫其首男子耕農女子織紵兵具矛楯長刀木弓竹矢
或骨為鏃

交州記曰南定縣人足骨無節身有毛卧者更挾始得
起故名

山海經曰交脰國人因脚脰曲戾相交所以謂之交趾
南粵志曰龍編縣州之始有蛟龍編於水之間因以為
瑞而名邑

武義州

方輿志曰武義州武義郡土地與南安都護府同唐置
武義州

粵州

方輿志曰粵州龍水郡土地與南安府同唐為粵州或
為龍水郡

芝州

方輿志曰芝州忻城郡土地與南安府同唐為芝州或
為忻城郡

愛州

方輿志曰愛州九真郡秦象郡地漢武置九真郡後漢亦同晉屬九真郡宋齊因之梁置愛州隋為九真郡唐又為愛州

福祿州

方輿志曰福祿州福祿郡土地與九真同唐為福祿州

長州

方輿志曰長州文陽郡土地與九真同唐為長州

驩州

方輿志曰驩州日南郡古越裳氏國九譯所通者也秦屬象郡二漢屬九真郡吳分置九德郡晉宋齊因之隋置驩州後為日南郡唐為驩州

郡國志曰龐山口洞人朱其兩齒為飾刻青作花文中山立市十日一會鑄銅為器火盤名勞勞以為財市

峯州

方輿志曰峯州承化郡古文郎國

有文郎水

亦陸梁地秦屬

象郡二漢屬交趾郡吳分置新興郡晉改為新昌陳置興州隋平陳改為峯州煬帝初廢唐復置峯州

林邑記曰蒼梧以南有文郎野人居無室宅依樹上宿食生肉採桑為業與人交易若上古之人

陸州

方輿志曰陸州玉山郡秦象郡地漢以來屬交趾郡梁分置南州及寧海郡隋平陳郡廢改南州為玉州煬帝初州廢唐復置玉州上元二年改為陸州州有陸水

廉州

方輿志曰廉州合浦縣秦象郡地漢置合浦郡後漢同
吳改為珠官晉又為合浦郡宋因之兼置臨漳郡及越
州齊又因之隋改為祿州尋改合州唐置廉州

後漢書曰孟嘗字伯周會稽上虞人為合浦太守先是
太守多貪珠遂徙向交趾嘗到革前弊珠遂還稱為神
明桓帝徵之

巖州

方輿志曰巖州安樂郡土地與合浦郡同唐為巖州或為安樂郡

雷州

方輿志曰雷州海康郡秦屬象郡地二漢以後並屬合浦郡梁分置合州大同末為南合州隋煬帝初廢唐為雷州

投荒錄曰雷州南濱大海多雷雷之聲近在簷宇之上雷州之北高州之南數鄉亦多雷雷聲似在尋常之外

俗俟雷時具酒肴設奠畏雷法甚嚴謹有以彘肉與鷄肉食者霹靂即止

禺州

十道志曰禺州溫水郡古百粵地嫫女之分野秦屬象郡本巖昌之邊邑唐置巖州又改為禺州以南方番禺之地因名州

湯州

方輿志曰湯州湯泉郡秦屬象郡地唐置湯州或為湯

泉郡

襄州

十道志曰襄州臨潭郡禹貢揚州之域春秋屬楚在鬱
林之西南交趾之北隋大將軍劉方始開此路為鎮守
尋又不通唐貞觀二年清平公李弘節遣欽州首領甯
師宗招慰開拓尋劉方舊路得達交州為州在襄水之
東故以為名

襄音向
章反

籠州

十道志曰籠州扶南郡古越地在南粵之西界唐貞觀十二年大使清平公李弘節招降獠置籠州以洞為名

環州

十道志曰環州整平郡禹貢揚州之域分隸桂州貞觀十二年李弘節招慰款討環落洞故以名州州在遊廬水南整水北

古州

方輿志曰古州樂興郡土地同臨潭郡唐置古州或為

樂興郡

崖州

方輿志曰崖州朱崖郡郡地海中之洲也洲方千里與
今海康郡之徐聞縣對自徐聞徑度便風揚帆一日一
夕即至梁置崖州

漢書曰武帝元鼎六年開南海地置朱崖儋耳二郡元
帝罷朱崖郡以其阻絕數反故罷之

郡國志曰崖州婦人著總綆以土為釜器用瓠瓢無水

人飲唯石汁又有椒以安石榴花著甕中經旬即成酒其味香美能醉人

交州記曰朱崖在大海中南極之中

儋州

十道志曰儋州昌化郡土地所屬與朱崖同漢元鼎六年定越地置儋耳郡唐武德四年置儋州

漢書張晏註曰儋耳其俗鏤其頰皮上連耳匡分為數支狀似鷄腸因名焉

海內南經曰有離耳郭景純註曰鍤其耳分令下垂為飾卽儋耳也

振州

方輿志曰振州延德郡土地與朱崖郡同隋置臨振郡唐置振州

瓊州

方輿志曰瓊州瓊山郡土地與朱崖郡同唐貞觀六年割崖州置瓊州

萬安州

方輿志曰萬安州萬安郡土地與朱崖郡同唐置萬安
州或為萬安郡

太平御覽卷一百七十二